

## IN LOCO

DE LEGE CEREMONIALI.  
THEOREMATA.

1. **L**ex Ceremonialis est ordinatio externa, à Deo per Mosen populo Judaico tradita de sacrificiis, totoq; cultu Judaico, quo Judæi nō solum ab aliis gentibus distincti, sed & Christus cū beneficiis suis est adumbratus, & sinceris cultoribus per fidem verè applicatus.

2. Ceremonias Livius l. 5. dictas vult ab oppido Thusciz, Cere, idq; quia Roma à Gallis direpta, Cives eò sacra detulerint. Macrobius l. 2. *Saturnal. c. 3. Gellius. l. 4. c. 9. August. l. 1. Retract. c. 37.* à carendo nomen habere volunt, quasi carimonias, propterea, quod quædam ceremoniz sint de rerum creatarum carentia, seu abstinentia, quales fuerunt res sive divino mandato prohibitæ, sive dispensatæ, quibus Judæis vesci licitum non erat *Levit. 12.* Alii à caritate derivant, quod sint res maximè caræ, gratæ & hominibus acceptæ, ut Festus scribit. Verissima autem videtur Scaligeri sententia, qui Ceremoniam derivat ab antiqua voce Cerus, quæ idem quod Sanctus olim significabat; ut igitur à Sanctus est Sanctimonia, ita à Cerus est ceremonia, sunt enim Ceremoniz ritus & gestus externi circa res sacras, sive devotum cultus divini exercitium occupati.

3. Leges Ceremoniales sunt vel publicæ, vel privatæ.

4. Publicæ respiciunt vel personas, vel res, vel locum vel tempus.

5. Personæ publicæ, sunt *Summus Sacerdos*, de cujus consecratione, vestibus, & officiis præcipitur *Levit. 8. & 24. & 16. & 21. Exod. 28. Sacerdotes secundi ordinis* de quorum vestibus, inauguratione, debitis, agitur *Levit. 8. & 4. & 14. & 20. & 21. Mal. 2, 7. Num. 6. Levitæ*, de quibus *Levit. 8. Deut. 27. Nazaræi, Num. 6.*

6. Res sunt vel Sacramenta vel Sacrificia.

7. Sacrificia sunt holocaustum, *Levit 1. & 6. & 7. Oblatio pro peccatis ignorantia Levit. 4. Sacrificium pro delicto, Levit 6. & 7. Consecrationis Levit 6 & 8. Mundationis Lev. 12. & 14. & 15. Num. 19. Expiationis, Levit. 16. Cibarium, Lev. 21. Pacificum, Levit. 7. Oblatio primitiarum, Num. 18. Deut. 26. Levit 23. Decimarum Lev. 27. Num. 18. Vaccarufa, Lev. 19. Sacrificium jure Num. 28.*